

तोआई श्री अमरनाथ जी श्रद्धालुएं दा 12मां जत्था अज्ज बड्डलै सख्त सुरक्षा बंदोबस्तें हेठ जम्मू दे भगवती नगर “यात्री निवास” आधार शिविर थमां कश्मीर घाटी लेई रवाना होआ। साढ़े संवाददाता दी रिपोर्ट मुजब, 303 गड्डियें दे काफिले च रवाना होए दे इस जत्थे च कुल 7 ज्हार 754 श्रद्धालू न, जिंदे चा 2 ज्हार 896 श्रद्धालू बालटाल लेई ते 4 ज्हार 458 श्रद्धालू पैहलगाम लेई रवाना होए दे न। इस जत्थे च कुल 5 ज्हार 383 मर्द, 2 ज्हार 71 महिलां, 16 बच्चे, 222 साधु, 58 साध्वियां ते 4 ट्रांसजेंडर श्रद्धालू शामिल हे।



Udhampur Airport

उधमपुर ब्हाई अड्डा परियोजना जिसी मते चिरै थमां बलगेआ जाऱदा ऐ दे निर्माण बक्खी अगड़े बद्धे होई इक होर महत्वपूर्ण पड़ा पार करी लैता गेआ ऐ- जेहड़ा एहदी टर्मिनल इमारत दे निर्माण कन्नै तालुक रखदा ऐ। केन्द्री मंत्री डाक्टर जितेन्द्र सिंह होरें जानकारी दिती ऐ जे इस परियोजना लेई टेंडर जारी करने गितै तकनीकी निलामी आस्तै टेंडर 10 जुलाई गी खोले गे - । उ'नें दस्सेआ जे एहदे लेई बोली लाने दी प्रक्रिया कोई 22 जुलाई दे कोलकाल शुरु कीती जाहग ते अगस्त महीने दे दंऊ हफते तगर खुशबा कम्मै लेई ठेका बी देई दिता जाहग। डाक्टर सिंह होरें आखेआ जे एह महत्वपूर्ण परियोजना तौले तोढ़ चढ़ै एहदे लेई एहदी प्रक्रिया ते कम्मै कारवाएं पर नेइमी तक्क रखी जाऱदी ऐ।



Film Fest Entries

सूचना ते जन-सम्पर्क निदेशालय ने जम्मू-कश्मीर दे पैहले-पैहले अंतराष्ट्री फिल्मोत्सव -2026 जेहड़ा जे 7 कोला 10 सितम्बर 2026 तगर शेर-ए-कश्मीर अंतराष्ट्री कन्वेंशन सेटर श्रीनगर च मनक्कत कराया जाऱदा ऐ- लेई फिल्में दियां एंट्रियां मंगी भेजियां न। एह एंट्रियां 31 जुलाई तगर भेजियां जाई सकदियां न। इस फिल्मोत्सव दा मकसद जम्मू-कश्मीर गी सिनेमा- संस्कृति ते कला दे आदान- प्रदान दे इक प्रमुख केन्द्र दे रुपै च विकसित करना ऐ। इस फिल्मोत्सव च केई राश्ट्री ते अंतराष्ट्री श्रेणिएं दियां फिल्मां दस्सियां जाडन। इंदे च ओह फिल्मां बी शामिल होडन जिंदे राहें विरासत, परम्पराएं, संस्कृति ते कुदरती छलैपे गी बी प्रदर्शत कीता गेदा होग।



Pahari Literary Meet

राजौरी च इक रोजा प्हाड़ी साहित्य सम्मेलन दा आयोजन कीता गेआ, जेहदे च पीर-पंजाल इलाके ते जम्मू-कश्मीर दे लखारियें, कवियें ते साहित्य प्रेमियें गी इक मंच पर किट्ठे आहनेआ गेआ। इस कार्यक्रम च मन्ने-परमन्ने दे लखारिएं दिएं केई किताबें दा विमोचन कीता गेआ ते एदे च युवा विद्यार्थियें गी अपने साहित्य सरबन्धी हुनर दस्सने दा मौका बी थोआ। इस मौके पर बोलदे होई राजौरी दे विधायक इफ्तखार अहमद होरें आखेआ जे इस चाल्ली दे साहित्य सरबन्धी किट्ठ पहाड़ी भाषा गी बढ़ावा देने ते इलाके दी सगो-सार सांस्कृतिक विरासत गी

बरकरार रखने लेई महत्वपूर्ण न, कन्नै गै मते शा मते नौजवानें गी साहित्य दे क्षेत्र च शामिल होने लेई प्रोत्साहित बी कीता जा'रदा ऐ।

<><><><><><>

Weather

मौसम विभाग नै अज्जै कोला लेइयै 17 जुलाई तगर जम्मू-कश्मीर दे बक्ख-बक्ख हिस्से च गर्मी ते गुम्मे दे कन्नो-कन्नी बिच्च-बिच्च किश समें लेई हलकी बरखा दी पेशनगोई कीती ऐ। जारी जानकारी मुजब 18 कोला 20 जुलाई दे दौरान केन्द्र शासत प्रदेश दे मते सारे हिस्से च गर्ज चमक कन्नै बरखा बरने दा इक होर गेड़ लग्गने दे बी असार दस्से गेदे न। लोकें गी सलाह दिती गेई ऐ कि ओ भारी बरखा ते गड़करने चमकरने दौरान मते सौहगे-सतर्क रौहन।

<><><><><><>

Adv. Announcement

आकाशवाणी जम्मू दे प्रादेशिक समाचार एकांश ने प्हाड़ी भाशा लेई कैजुअल न्यूजरीडर-कम-ट्रांसलेटर ते स्टेनोग्राफर दे पैनल च शामिल होने लेई जम्मू-कश्मीर दे रौहने आहले 21 शा 50 ब'रें धोड़ी दी उम्मी दे इच्छुक मेदवारें कोला दरखास्तां मंगियां न।

कैजुअल न्यूजरीडर-कम-ट्रांसलेटर लेई घटोघट्ट योग्यता कुसै मान्यता हासल यूनिवर्सिटी थमां ग्रेजुएशन ते प्हाड़ी भाशा दी शैल जानकारी दा होना ऐ। न्यूजरीडर लेई (प्रसारण लेई मुआफक) खरी अवाज दा बी होना जरूरी ऐ।

स्टेनोग्राफर लेई, घटोघट्ट योग्यता कुसै मान्यता हासल एजुकेशन बोर्ड थमां 12मीं पास होना ते प्हाड़ी भाशा च खरी जानकारी दा होना ऐ। कन्नै गै, कम्प्यूटर पर प्हाड़ी भाशा च टाइपिंग दी स्पीड 25 कोला 40 लफ़्ज़ फी मिंट होनी लोड़चदी ऐ।

आवेदन दी हार्ड कॉपी 'हेड ऑफ न्यूज, रीजनल न्यूज यूनिट, आकाशवाणी, पंजतीर्थी जम्मू पिनकोड-180001'दे दफ्तरै च (दस्ती) जमा करोआनी होग। एहदे कन्नै सब्बै जरूरी दस्तावेज ते आवेदन शुल्क बी होना चाहिदा (जेहड़ा वापस नेई होग)। सामान्य श्रेणी दे मेदवारें लेई एह शुल्क 355 रपे ते एस.सी/एस.टी/ओ.बी.सी मेदवारें लेई 265 रपे (18 फीसद जी.एस.टी सने) ऐ।

एह शुल्क प्रसार भारती, आकाशवाणी, जम्मू दे बैंक खाता नंबर 10582387126(एस.बी.आई मेन ब्रांच, हरि मार्केट, जम्मू) च ऑनलाइन जमा कीता जाई सकदा ऐ। आई.एफ.एस.सी कोड: SBIN0000657 ऐ। शुल्क जमा करने दे बाद मिले दे स्क्रीनशॉट दा प्रिंटआउट जां ऑनलाइन पेमेंट/ट्रांजैक्शन आई.डी, आवेदन दे कन्ने जरूर होनी लोड़चदी। आवेदन करने दी खीरी तरीक 19 जुलाई 2026 (ऐतवार) ऐ। मती जानकारी टेलीफोन नंबर 0191-2546658 ते 9697177241 पर लैती जाई सकदी ऐ। तफ्सीली इश्तेहार ते आवेदन फॉर्म साढ़ी वेबसाइट www.newsonair.gov.in पर होमपेज दे अखीरै च 'Vacancies' आइकन पर उपलब्ध ऐ।

<><><><><><>